

Govor predsjedatelja Zastupničkog doma Parlamentarne skupštine BiH Nikole Špirića na Petoj konferenciji predsjednika parlamenata Procesu za suradnju u Jugoistočnoj Europi (SEECP) u okviru sesije "Europska budućnost zemalja SEECP-a"

Atina, 17. ožujak 2006.

"Poštovani gospodine predsjedavajući,
Ekselencije,
Poštovane kolege,
Dame i gospodo,

Imam izuzetnu čast i zadovoljstvo da vas pozdravim u ime Parlamentarne skupštine BiH i u svoje lično ime, da prijateljskom grčkom narodu prenesem pozdrave i zahvalnost za svu pomoć, kao i najbolje želje za prosperitet i blagostanje. Organizatorima ovog skupa odajem priznanje za odličnu organizaciju i dobrodošlicu koja se osjeća na svakom koraku tokom našeg boravka.

Dozvolite mi da, prije svega, kažem da Bosna i Hercegovina čvrsto stoji na pozicijama zapisanim u Bukureštanskoj Povelji, na njenim osnovnim principima i ciljevima. Vjerujem da dijelite moje mišljenje da se kontinuirano radi na unapređenju dobrosusjedstva i saradnje, stabilnosti i bezbjednosti među zemljama regiona, kao i na postupnom uključenju zemalja u evroatlanske političke, bezbjedonosne i ekonomske integracije. Na nama je da podstaknemo politički dijalog i ukažemo na područja u kojima se saradnja treba konkretizovati i intenzivirati.

Jedan od glavnih ciljeva spoljne politike Bosne i Hercegovine je unapređenje saradnje sa susjedima i zemljama regiona, a strateški cilj je pristupanje Evropskoj uniji. Kao što, pretpostavljam, znate, započeli su pregovori o zaključenju Sporazuma o stabilizaciji i pridruživanju između Bosne i Hercegovine i Evropske unije. Bez obzira na zastoj u pregovorima o evropskom Ustavu, uvjereni smo da ćemo prihvatanjem evropskog naslijeđa u pravosuđu, bezbjednosti, obrazovanju, trgovini i drugim sferama,

postati dio evropske zajednice, što je interes naše zemlje, ali i zemalja članica Evropske unije.

Složit ćemo se da je napredak evidentan u cijelom Regionu, ali ipak, neujednačen, naročito u pogledu ostvarivanja održivog razvoja. Uspostavljanjem trajnog mira, u prvi plan izbijaju ekonomska i socijalna pitanja. Bosna i Hercegovina se suočava sa problemom slabe privrede, visokom stopom nezaposlenosti i neadekvatnom socijalnom kohezijom.

Nadalje, složit ćemo se da razvoj trgovine i investiranje u Bosni i Hercegovini značajno zavisi od političke stabilnosti, sveukupne ekonomske klime i napretka naše zemlje, kao i regiona u cjelini. Treba nastaviti raditi na makroekonomskoj stabilnosti, posebno na fiskalnoj i monetarnoj politici kako bi se osiguralo okruženje koje vodi ka održivom razvoju. Bosna i Hercegovina mora uznapredovati u restrukturiranju i privatizaciji državnih preduzeća. Strukturalne reforme bi dalje vodile poboljšanju funkcionisanja tržišta i konkurentnosti.

Bosna i Hercegovina uživa tretman autonomnih trgovinskih mjera, kao i susjedne zemlje, što znači bescarinski pristup na tržište Evropske unije za sve bosanskohercegovačke proizvode. To bi samo po sebi trebalo unaprijediti trgovinu sa Evropskom unijom i stimulisati direktne strane investicije i ekonomski razvoj uopšte. U praksi ova se povoljnost ne može koristiti u značajnijoj mjeri dok se izvrši restrukturiranje privrede i ne ojačaju administrativni kapaciteti u pogledu usklađivanja industrijskih, sanitarnih, fitosanitarnih, veterinarskih, trgovinskih i drugih standarda.

Veliki napredak je postignut u oblasti povezivanja međunarodnih energetskih mreža, a radi se i na poboljšanju regionalne transportne mreže.

Dozvolite da samo pomenem i neophodnost stvaranja povoljnijih uslova za razvoj malih i srednjih preduzeća što bi imalo ogroman značaj za održivi rast privrede Bosne i Hercegovine.

Gospodine predsjedavajući,

Koristim ovu priliku da se još jednom založim za liberalizaciju viznog režima između naših zemalja koje su na različitom stepenu integrisanosti u Evropsku uniju. Bosna i Hercegovina je provela ključne reforme u oblasti pravosuđa i bezbjednosti uključujući borbu protiv organizovanog kriminala, jačanje institucionalnog kapaciteta,

bolju saradnju između policije i tužilaštva, mjere za suzbijanje trgovine drogom, pranje novca i ilegalne migracije. U značajnoj mjeri, uz pomoć međunarodne zajednice, ojačani su administrativni kapaciteti u pogledu granične kontrole i sigurnosti dokumenata. Olakšavanje kretanja ljudi, tj. veće otvaranje zemlje prema svijetu doprinjelo bi razmjeni znanja, iskustva i kultura sa drugim narodima.

Mi u Bosni i Hercegovini snažno vjerujemo u evropske vrijednosti i dostignuća i spremni smo doprinjeti evropskom integracionom procesu.

Uvjeran sam da će i ova naša Konferencija potvrditi opredjeljenost naroda Regiona da se dalje razvijaju u uslovima mira i prosperiteta.

Zahvaljujem se na pažnji." (kraj)